

COLOSSOS KA WATWAT PEAPTUP PAULO EMUDUPMUBARARAKTUP

¹⁻² Colossos ka watwat, cartadup mubarararağ òn eywebeaptum. Òn Paulo. Ijudup mubarararağ òn wuykitpit Timóteo eju. Eyju wuykitpitpiyũ Colossos ka be. Cristo a'õ dağ eyju jekukum soat em. Jesus Cristo emumuju òn Deus bikuyap tağ.

— Bay, xipan cuy Colossos ka watwat ejukuk — i òn e'em Deus pe—wuyebay be, Jesus Cristo be dak—wuykukukat pe. — Ixeyũ ağuy mubabibin cuy eğuy — i òn e'em cebe ip.

³⁻⁴ — Itabut cĩcã ip Jesus Cristo kay Colossos ka watwat — i juk o'e Epafró ocewebe. — Xipan Deus ebekitkiyũ kuğ ip — i juk o'e. — Xipan soat kuğ ip, Deus xe acesop iap wiwim puye — i juk o'e ocewebe. Imẽnpuye:

— Bay, ẽn xipat cĩcã — i oceju e'em soat em Deus eju eywebeam kawẽnwẽn pima—Jesus Cristo ebay eju.

⁵ Soat em Deus xe acesop iap ekawẽn kuy epejojo kawẽn icẽmat co buje—kawẽn idipat co buje. Iboap wiwim eyju ġasũ. Icẽmãn epesop ixe xe, “Oxe ma epesop” io'e Deus puye—kabi beat o'e buye. Imẽnpuye Jesus kay eyetabut cĩcã. Xipan soat kuğ tak eyju. ⁶ Deus xipan wuykuğ—soat kuğ iap ekawẽn kuy epeya'ĩjojo. Eyetaybit epesop iboap ekawẽn icẽmãn iam koap em cekawẽn co'isum. Soat eipi dağacat kawẽn idipat cocom ġasũ. Ixeyũ dak itabut Jesus kay. Xipan soat kuğ tak ip itabucayũ kuğ. Wuye'ũ buje soat em Deus xe acesop iap wiwim tak ip. ⁷ Epafras kawẽn idipat o'ğuwẽn eywebe. Ixe Epafras wuybure ikukpin cĩcãat wuyxe. Cũğ me ixe kapikpiğ Cristo muwẽnuwẽn warara'acat pe. Ixe eybuywatwan ocedieğ ġasũ bit.

⁸ — Colossos ka watwat jewewekuḡ ip cewekukpin cīcā, Deus jebiōḡbuk o'ḡuōm cebe ip puye — i juk o'e ixe Epafras ocewebe.

⁹ Imēneju soat em oceju kawēn Deus eju eywebeam. Eyawēḡ tobuxik puje ocebu'u ḡu ocesop jekawēn ām eywebeam. Imēn oceju e'em Deus pe:

— Bay, ocekitpitpiyū juy eḡutaybin apēn ebikuy ixeyū be jeku am iam — i. — Ixeyū juy eḡutaybin apēn xipat exe iam, apēn ikērē exe iam tak — i oceju e'em. — Iboam itaybit cīcā je'e ip ebiōḡbuk ixeyū mutaybitbin puye — i oceju e'em cebe.

¹⁰ Iboam eyetaybit pima, cūḡ ma epeku; soat em wuykukukat bikuyap taḡ epeku; soat em ixe mucokcokcoḡ epesop; xipacat epeḡurūḡrūḡ soat em; biḡ ma eyetaybit epesop Deus e'e iam.

¹¹ — Bay, ēn soat podi ma a'ōbaca — i ōn e'em Deus pe. — Soat podi ma ēn edipap kuḡ — i ōn e'em. — A'ōbacaap cuy eḡūm Colossos ka watwat pe Jesus kay ip jebu'uap puxim ipiatpi'ajojom ma'ḡu ip — i ōn e'em Deus pe.

¹² Deus kabiaat kukat. Ixe ebekitkit xipacat murūḡrūḡ'ukayū. Ixe xipacat muxipanpan iūm ām jebekitkit pe.

— Cūḡ ma eyju oxe webekitkiyūm — i juk o'e Deus wuywebe.

Imēnpuye wuyju dak xipacat acejat. Iboap wiwim cīcā wuyju. Imēnpuye eyju dak eycokcoḡ cuy epesop.

— Xipat cīcā ēn — i juy epe'e'e wuyebay be.

¹³ Satanás kabiokat kukat. Ixe ebekitkit ikērēat murūḡrūḡ'ukayū. Deus pit wuy'uk kabiokat kukat pui bewi. Imēnpuye Satanás ḡu wuykukukat ḡasū—Deus ipot acā. Deus ipot ikukpin cīcā cexe. ¹⁴ Ixe ipot wuy'uk kabiokat kukat pui bewi. Ikērēat muḡēaptei o'teida, oe'ū buye. Imēnpuye ikērēat kuḡ ḡu wuyju ixe xe.

¹⁵ Deus ijo ba'ore wuywebe. Wuyetaybit bitku poro omuyku Cristo jojom, Cristo dak ijo'i buye. Ixe Cristo Deus ipot koapat. Soat Deus emumuḡẽ bodi ma ya'õbuyxi ixe. Deus pe ipi mujurũḡ'ũm pima ipot itait osunuy. ¹⁶ Deus soat o'ḡubapukpukpuk Cristo eju. Kabi beacat o'ḡubapukukpuk soat ceweju, ipi daḡacat tak. Wuywebe ijobucat o'ḡubapuk soat, wuywebe ijo ba'oreat tak. Ya'õbuyxiayũ kabi watwat o'ḡubapuk Cristo eju, ya'õbacaayũ dak, warara'acayũ mujuju'ukayũ dak, warara'acat kukukayũ dak. Deus ixe eju soat o'ḡubapuk. Soat o'ḡubapuk cebeam. Soat o'ḡubapuk ijodiacat pe Cristo kuk am ibuyxi am. ¹⁷ Kabi, ipi ka'ũm pima, Cristo kuy osunuy itabẽḡ. Ipi daḡacat jedopap pe ma dopdom Cristo a'õbi. Kabi beacat tak dopdom jedopap pe ixe a'õbi. ¹⁸ Wuya'a wuyjebit kukat iap puxim Cristo jekay itabucayũ kukat. Apẽn wuya'a wuyaḡuydadam iap puxim Cristo dak itabut jekayayũ aḡuydadam. Ixe Deus ipot koapat. Ce'ũap tomukadi Deus ixe Cristo waram o'ḡutait. Soat podi ma ya'õbuyxian o'ḡutait. Wuyju dak waram acejetait wuye'ũ buje Deus ixe o'ḡutait puye. ¹⁹ Deus o'e jewebe ma:

— Okpot ojo'ian je'e — i.

Imẽnpuye jewa'õbaca jojo'i ma ip. ²⁰ Ipi watwat itakoma osodop Deus kay, kabi beacat tak. Deus o'e jewebe ma:

— Soat ip o'ḡudin obureyũm—ipi daḡacat, kabi beacat tak — i. — Kũyjobin jeedop ip wa'õ kay korosa be okpot e'ũ buje — io'e jewebe ma.

Imẽn Deus ip o'ḡudin jekay. Itakomaap ip o'ḡu'ũm korosa be jekpot oe'ũ ibuye.

²¹ Eyju dak Deus bureyũm ḡu epesop kuy bima. Cekay'ũm cĩcã juk adi epesop. Imẽnpuye ikẽrẽat kay acã juk adi ḡebum epesop. Ikẽrẽat mujurũḡrũḡ'uk tak adi epesop. ²² Ḡasũ bit Deus eymuwexat jebureyũm ipot oe'ũ

buye. Kuy eymuwexat eymudot am jewekay. Imēnpuye cūḡ ma epesop ixē wap eyajēm puje. Ikērēat kuḡ ḡu epesop. Abu je'e eywebe:

— Xipat ḡu eyju! — i?

Ka'ūma ma! ²³ Imēneju eyetabun cīcā juy epesop Jesus kay. Eybu'um ḡu juy epesop cekay! Koap em kawēn idipat co ebikam Deus xe acesop wuye'ū buje iap wiwim cuk epesop. Eyday'em'um cuy epesop warara'acat pe eymubu'unap puxim iboap wiwi am. Ibo muwēnuwēn'ukat ōn—kawēn idipat muwēnuwēn'ukat. Kawēn idipat muwēnuwēn ōn soat kaka daḡ.

²⁴ Ocokcok cīcā, ōn ipiat osupi'ajo eywebeam puye. Cristo ipiatpi'ajojom mabuk jekay itabucayū beam—jejebit puximayū beam. Imēnpuxim ōn tak ipiatpi'ajojom Cristo be o'supi'ajojo iap mu'ūm ām.

²⁵ Deus o'e owebe:

— Itabucayū buywatwan cuy eḡuy — i. — Imēn ma kapikpiḡ cuy eḡuy wa'ōbi — io'e owebe.

Ijop ekapikap o'ḡūm owebe eybuywat am.

— Wekawēn muwēnuwēn cuy eḡuy soat ka watwat pe — io'e owebe.

²⁶ Kuyje Deus soat ka watwat pe ḡu jekawēn o'ḡuwēnuwēn. ḡasū bit o'ḡuwēn jekay itabucayū be. Ibo ekawēn muwēnuwēn'ukat ōn. ²⁷ Cristo omuy eywebe Judeuyū ḡu ma'ḡu eyju. Imēnpuye Deus jedipap mubapuk puje, eyju dak idipap kuḡ epesop. Iboap wiwim cīcā eyju. Kuy bima iboap iba'arēm osodop soat xe ijodiacat xe. ḡasū bit Deus soat jebekitkit mutaybit pin iboam. Iboap idip cīcā. Xipat cīcā dak. ²⁸ Imēneju Cristo muwēnuwēn oceju soat ka watwat pe.

— Teyūku soat em Jesus kay e'em — i oceju e ojuy Deus pe ixē dopabe ixeyū dojot puje. — Soat em teyūku Cristo eju mūḡ'i jekukum — i oceju e ojuy cebe.

Imēneju Cristo muwēnuwēn oceju soat pe ijodiacat pe. Soat awēwēm oceju. Soat jetaybitbicap eju oceju ip imutaybitbin. ²⁹ Imēneju kapikpiğ cīcā ōn. Cristo ja'ōbacaap ūmūm owebe cebe wekapik am. Ixe Cristo soat podi ma ya'ōbaca. Ixe Cristo ja'ōbacaap ūmūm owebe. Imēnpuye ijodiacat mutaybin put owebe.

2

¹ Kapikpiğ cīcā juk adi oğuy eywebeam—ojojo'uk'ūmayū beam, Laodicéia ka watwat peam tak. Ōn jeymukūyjo iboam. ² Cebeam ip cuk adi kapikpiğ cīcā oğuy ixeyū be biğ ma jewewa'ōmucan am Jesus ekawēn tağ jeku am; biğ ma jewewekukpin am tak; warara'acat podi ma itaybit am tak kawēn icēmān. Iboam itaybit pima, soat em Cristo kay jeedop ip. Jawağuy muwarururun ġu jeedop ip Jesus ekawēn tağ xe'e oceku iam. Kuy bima itaybit ġu ip osodop Cristom. Ğasū bit ip oitaybit ixem. ³ Soat ġu wuyetaybit Deus emumutaybitbin iam. Wuyetaybit ġūğūn ā. Cristo bit xīntabi o'tomudip'uk iap puxim. Cristo eju mūğ'i wuyju jekukum pima, wuyetaybit put Deus emumutaybitbin iam, apēn cūğ ma Deus xe iam tak, apēn cūğ ġu cexe iam tak.

⁴ Imēneju jeymukūyjo ōn. Eyday'em'um cuy epe-sop warara'acat pe eymuğuykukuap puxim. Adeayū xe cekawēntip ip. Imēnpit cūğ ġu ip. Napa ma ip kawēnwēn eyweju eymutabucap ojuy napaap kay. ⁵ Imēneju soat em ġebum ōn eykay, eyxe ġu ma'ğū ōn. Pūğ tağ ma eyju e'em. Soat em eyetabut Jesus kay. Ocokcok cīcā ma iboap cocom puye.

⁶ — Ocekukukan cuy ece — i juk adi epe'e Jesus Cristo be, eyetabut puye cekay.

Ĝasū bit mūĝ'i juy epeku ixē eju. ⁷ Kadai nābu muycemap puxim Cristo wuya'ōmucanucan wuyetabucap epereap puxim. Imēnpuye biĝ ma juy eyetabun epesop cekay. Ĝebum cekayap tomuju juy soan e'em epesop. Kuy juk adi ocewebe eymutaybitbinap taĝ cuy epeku. Soat em cuy epe'e'e Deus pe:

— Bay, ĕn xipat cīcā — i. — Soat em ĕn xipan ocekuĝ — i juy epe'e'e cebe.

⁸ Eyday'em'unum cuy epesop warara'acat pe eymubu'unap puxim Jesus kay apĕn wuyju taomūn ām ibubum iap puxim. Ixeyū Cristo ekawĕn ĝu eymutaybitbin. Ijodiacat ekawĕn acā eymutaybitbin ip—Deus kay'ūmayū ekawĕn—ipi juacat aĝuymubarĕmrĕm'ukayū ekawĕn. Eymuĝuykuku ojuy ip. Te'e ma eymutaybitbin ip. Eyetabun ĝu juy epesop ixeyū a'ō kay. ⁹ Cristo jewa'ōbaca jojo'i ma ip Deus eju. Cristo ijodiat co'ian o'jewexat wuymutaybit am Deus e'e am. Wuyetaybit Deus e'e am Cristo e'eap co buje. Imēneju eyday'em'unum cuy epesop warara'acat pe eymubu'unap puxim eyetabut am Jesus kay. ¹⁰ Cristo eju mūĝ'i jekukum pima, wuyju dak Deus a'ōbacaap kuĝ acesop. Ixe Cristo soat podi ma ya'ōbuyxiat—Deus ekawĕn tojtjot'ukayū kukukayū bodi ma, ibiōĝbuk itabidaoiayū kukukayū bodi ma dak.

¹¹ Imĕntak Cristo ja'ōbacaap o'ĝūm eywebe ikĕrĕat kukap puxim ixē eju eyju mūĝ'i buye. Aĝokatkat'it'it taypu'aĝobixeedakatkat'uk osodop ip kuyjeayū teku iisu Deus xe i'eap ojuy. Deus pit soat taĝ wuymuisusun wuyxeedakatkat puye ĝu—Cristo eju wuyju mūĝ'i buye acā. ¹² Wuymubatisasan puje Cristo a'ōbi wuyaĝuyokokat oi'ūm wuye'ūap puxim. Ixe a'ōbi oi'ūm wuykocap puxim. Kuy bima Deus waram ĝuto Jesus o'ĝutait ce'ūap to-mukadi. Imēnpuxim ijodi bima dak wuyaĝuy'isum wuyju

jekukum waram ġuto wuyetaicap puxim wuye'ūap to-mukadi. Wuyaġuy'isum wuyju jekukum ġasū Deus soat podi ma ya'ōbaca iap kay wuyetabut puye. ¹³ Imēnpuxim eyju ma ikērēat mujurūġrūġ cīcā juk adi epekukuku eyaġuyokok puye. Ce'ūat puxim cuk adi epesop Deus xe ikērēat kay acā ġebum puye. Judeu'ūmat puxim tak cuk adi epesop—Deus pe wuyawēwēap ekawēn taġ jekukum'ūmat puxim. Deus pit kuy eyaġuymuisun ey-webe Cristo aġuy daġ jewaġuy am. Wuyaġuymuisun puje, ixē ikērēat o'ju'uk wuywebewi. Soat o'ju'uk. ¹⁴ Iba'ore wuywebe Deus pe wuyawēwēap ekawēn taġ jeku am—soat ekawēn taġ. Deus itaybit soat em teyūku wekawēn mupubutbun iam. Korosa be ixē e'ū buje bit, Cristo apēn cuk adi iboap ekawēn aġupubutbuniaptei o'teida. O'teida wuyekariwa be wuyeweroap teidaap puxim. Imēnpuye Deus ikērēat o'ju'uk wuywebewi. ¹⁵ Imēnpit Cristo Satanás a'ōbacaap o'ġu'ūm korosa be je'ū buje. Deus kay'ūmayū kukukayū a'ōbacaap o'ġu'ūm. Soat etabun ya'ōbacaap o'ġu'ūmiayū mubapukpuġ oeku imusūsūn ām. Imubapukpuġ oeku kuyjeayū be o'yaokaiat aririt'a mubapukap puxim.

¹⁶ Imēneju warara'acat a'ō kay ġu juy epesop eywebe te'e ma ixeyū e'em pima “Beku i'opi eywebe” i, “Ibiati tikōnpi eywebe” i dak, “Ibeat kabia be epeyekapikpik ġu juy” i dak, “Kaxiaat ijēm'isu bima, peta juy epeġuġē” i dak, “Sábado bima epeyekapikpik ġu juy” i dak. Ya'ō kay ġu juy epesop. ¹⁷ Ixeyū ekawēn taġ cuk adi jekuku'uk ajop Cristo ajēm'ūm pima. Kabicuk jewurūġwurūġ iap puxim jekawēn muwarururun ip soat em. Ġasū bit Cristo oajēm. Ixē ekawēn soat em ma ibit. Imēnpuye ixeyū ekawēn taġ ġu wuyju jekukum ġasū—Cristo ekawēn taġ acā. ¹⁸ Warēmtaġ eymutaybitbin'ukayū:

— Deus ipiat supi'ajoat eywebe, cūġ ġu eyju cexe buye

— i napa ma e'em ip eywebe.

Ixeyũ ekawẽn kay bit eyetabun ġu juy epesop. Jewexe ya'õbuyxi ip.

— Warara'acat podi ma oceju xipat Deus xe, soat em Deus ocemuyxeyxey buye — i'e'em ip te'e ma. — Ka'ũma ma oceju bit — i'e'em ip warara'acayũ be, “Warara'acat podi ma xipat oceju” i'e'em pima jewebe ma. — Deus kukap co'i juy cekawẽn tojtotjot'ukayũ ajukuk — i'e'em ip ocewebe te'e ma. — Warara'acat podi ma oceju xipat Deus xe — i'e'em ip te'e ma.

Warẽmtağ ma ip jewağuydadam. Deus ağuy dağ ġu ip jewağuyğuy—jağuy dağ acã. ¹⁹ Cristo eju mũğ'i ġu ip warẽmtağ jewağuyğuy buye. Cristo wuya'a buxim. Cekay itabucayũ ijebit puxim. Deus bikuyap tağ wuyju aypapan. Wuyekururukpu ibuboğatpu wuykukatpu wuyewedap tağatpu wuyewedap mucũğucũğatpu. Ibobu buxim Deus wuya'õmucanucan Cristo eju mũğ'i wuyeku am. Jewexe ya'õbuyxiayũ bit mũğ'i ġu cewēju.

²⁰ Cristo a'õbi eyağuyokokat oi'ũm eye'ũap puxim. Deus ja'õbacaap o'ğũm eywebe ibiõğbuk kërëat kukukayũ a'õ kayap puxim—Deus kay'ũmayũ kukukayũ a'õ kayap puxim. Imëneju Deus kay'ũmat ekukuap cuy epeyepere. Warẽmtağ eymutaybitbin'ukayũ a'õ kay ġu juy epesop.

²¹ — Boku juy epejukuk ġu — i'e'em ip te'e ma. — Beku juy epejo'o ġu — i dak. — Imënmën ġu bit epeku — i dak e'em ip te'e ma.

²² Soat ixeyũ xe ikukpiat, i'opiat, tikõnpiati darem ma kuy kapkam. Ijodiacat ekawẽn acã imuwënuwën ip—Deus ekawẽn ġu bit. Ijodiacat ağuy dağ acã ip kawënwën—Deus ağuy dağ ġu bit. ²³ Jewexe ip itaybitbit.

— Deus kukap co'a juy cekawẽn tojtotjot'ukayũ ajukuk — i'e'e ip te'e ma. — Ka'ũma ma oceju bit — i'e'em ip warara'acat pe, “Warara'acat podi ma xipat oceju Deus

xe” i'e'em pima jewebe ma. Ade cexe ip ikukpiat, i'opiat tak, tikōnpiati dak. Xipan ġu ip jejebit kuġ. Tūybe ikērēat acejukuk'ūma iān e'em ip. Ibo bit ka'ūma jo'i ma. Wuybuywat pa'ore ikērēat kukap puxim.

3

¹ Waram o'jetaitiat puxim eyju Cristo eju mūġ'i jekukum puye. Imēnpuye eyetabikum cuy epesop kabi beat kay. Iboce Cristo omuy Deus xe xik'i ya'ōbuyxiat tūyap pe, Deus co'i ya'ōbuyxi buye. ²⁻³ Ijodiakat eju ġu mūġ'i eyju jekukum—Cristo eju acā mūġ'i eyju jekukum. Imēnpuye ijoceap kay ġu juy epeyewaġuyġuy—kabi beat kay acā. Pūġ taġ ma jewaġuyġuy ip Deus, Cristo dak. Ixeyū aġuy daġ eyju dak jewaġuyġuy ġasū bit, Cristo eju mūġ'i eyju jekukum puye. Iboap ibapuk ġu itabut'ūmayū xe. Iba'arēm iboap cexe ip. ⁴ Eyaġuy'isum eyju jekukum Cristo eju mūġ'i buye. Waram yajēm puje, wuyju dak acejewemubapuk ceweju. Ixe dipap acejat. Wuydip ace'e ixē jo'i.

⁵ Imēneju ikērēat epeġuġē ġu juy. Ikērēat muġēġē pin eyju Deus kay'ūmat puxim. Epeġuġē ġu bit. Warara'acat tayxi eju epeyepo ġu juy. Warara'acat itop eju epeyepo ġu juy. Ikērēān cuy epeyekaypatpan ġu. Ikērēat epeġu-jurūġ ġu juy eyemumukaypin pu am. Aoyū kaykay ġu juy epesop. Eyetabikukum ġu juy epesop warara'acat pubut kay. Wuyetabikukuap ikērēat Deus xe deusbaroyū kay wuyetabucap puxim. ⁶ Deus ipiat supi'ajojoat imēn jekuku'ukayū be—kūyjobit'ūmayū be—ja'ō kay'ūmayū be. ⁷ Eyju dak cuk adi kuy bima warēmtaġ ma epekukuku. Eycokcok epesop ikērēat muġēġē'ukap kuġ.

⁸ ġasū bit ijop epeyepere. Eyetakomām ġu juy epesop warara'acat kay. Aoyū kaykay ġu juy. Eysapka'orerem ġu juy epesop. Warara'acat epejomuymuy ġu juy.

Eyekawēnkērēm ġu juy epesop—pũġ em tak ka'ūma.⁹⁻¹⁰ Cristo kay eyetabut puje, yaġuy'suayūm epesop. Kuy bima eyaġuyokok cuk adi epekuku. Eyaġuyokok ġu juy epekuku ġasū bit. Deus soat em wuyaġuymuisusun wuywebe jejo'i i'e am. Ġuyjom Deus aġuy daġ acā ġebum acesop. Biġ ma wuyetaybit ace'e Deus e'e am. Napa ġu juy epe'e'e eyewewebe.¹¹ Wuyaġuy'isu bima, ġebum ġu acesop teku Judeu iap kay, teku Judeu ġu iap kay dak. Ġebum ġu acesop teku taypu'aġobixeecukat iap kay dak, teku taypu'aġobixeecuk'ūmat iap kay dak. Ġebum ġu acesop teku pariwat iap kay, teku wuyjuyū iap kay dak. Ġebum ġu acesop teku tei'ūma kapikpik'ukat iap kay, teku teibubum kapikpik'ukat iap kay dak. Cristo kay acā ġebum acesop. Iteyū be soat pe Cristo muymuy iap kay ġebum acesop.

¹² Deus ebekitkit eyju. Deus xe eykukpin cīcā epesop. Ixe juk eynaē jewekay am. Imēneju eyetabotaidabotbon cuy epesop eyewewekay. Xipan cuy epeyewewekuk. Yoboġan pin ġu juy epesop Eyekawēnkērēm ġu juy epesop—eyekawēntim ma. Eyukpiceġēm ġu juy epesop eyewewekay.¹³ Epeyewebuywatwan cuy soat em. Eyx-eat warēmtaġ eykuġ pima, ix epejomuymuy ġu juy. Ġebum ġu juy epesop apēn cuk adi warēmtaġ eykuk iap kay. Wuykukukat Jesus ġebum ġu apēn cuk adi ikērēat aġujurūrūġ iap kay. Ixe buxim cuy eyju dak ġebum ġu epesop apēn cuk adi warēmtaġ eykuk iap kay.¹⁴ Xipan eyekukuap xipat Deus xe. Ibodi ma bit xipat eywebe xipan eyewewekuk am. Xipan jewewekuġ pima, wara'at taġtaġtaġ ġu epekuku—pũġ taġ ma.¹⁵ Cristo juk wuyuwexat jebekitkiyūm pũġ taġ ma wuyeku am. Ixe wuyaġuymubabibin wuyaġuybabi'ūmap puxim. Āġ cuy ix e jeyaġuymubabin. Ixe be eyaġuymubabin puje xipan

epeyewekuk. Pũḡ tak ma dak epeyewaḡuy. Soat em:

— Bay, ěn xipan cĩcã ocekuḡ — i juy epe'e'e Deus pe.

¹⁶ Soat em Cristo ekawĕn taḡ cuy epekuku. Xipat cekawĕn taḡ wuyeku am wuyju idip cĩcãat kuḡat puxim. Soan cuy jewemutaybitbin epesop. Soan cuy jewemukũyjobitbin tak epesop. Soat em cuy pibododon epesop Deus kay. “Cristo soat podi ma ya'õbuyxi” i'e pin pima, epeyebibododon cuy, “Cristo acã wuykukukat” i'e pin pima dak, eycokcok pima dak Cristo kay eyetabut puye, “Ěn xipat cĩcã” i'e pin pima dak Deus pe. Deus biõḡbuk a'õbi juy pibododon epesop. ¹⁷ Imĕneju soat em cuy epekuku wuykukukat Jesus a'õ daḡ. Soat em cuy epeyekawĕnwĕn ixē a'õ daḡ. Soat em:

— Ěn xipat cĩcã — i juy epe'e'e wuyebay be—Deus pe, wuykukukat Jesus oe'ũ buye.

¹⁸ Tũ'ũ'ũyũ, kũyjobin cuy epesop eyitopyũ a'õ kay. Kũyjobin cuy epesop ya'õ kay ip wuykukukat Jesus kay eyetabut puye.

¹⁹ Tapupuyũ, ikukpin cuy eytayxiyũ epejukuk. Xipan cuy ip epejukuk.

²⁰ Bekitkit, kũyjobin cuy epesop eyebay a'õ kay soat em, eyxi a'õ kay dak. Wuykukukat icokcok e'em eyebay a'õ kay bima.

²¹ Cebayũ, imuparararan ḡu juy eyebekitkiyũ epejukuk ixeyũ mubu'unap puxim kũyjobit am eya'õ kay.

²² Tei'ũma kapikpik'ukayũ, soat em cuy kũyjobin epesop eyekariwa a'õ kay ixeyũ eyjojom pima, eyjojom'ũm pima dak. Ixeyũ a'õ kay kũyjobin cuy epesop ixeyũ be “Ěn xipat” i'eap ojuy ḡu. Kũyjobin cuy epesop kũyjobit pin puye. Kũyjobin cuy epesop wuykukukat Jesus ya'õbuyxi eyxe buye. ²³ Eycokcoḡ cuy eyekapikap epejukuk. Ĝebum cuy epesop ijodiacat peam acã ḡu õn kapikpiḡ iap kay. Wuykukukat peam tak õn kapikpiḡ iap kay ḡebum

cuy epesop. ²⁴ Cristo ma wuykukukat. Ixe beam ma wuyju kapikpiğ. Wuykukukat jebekitkit peam xipacat o'ğuxipan. Ibo juy epejat. Ğebum cuy epesop iboap kay. Cũğ ma wuyeku buje, cũğ ma jekuapteı je'ğũm wuywebe. ²⁵ Warẽmtağ wuyeku buje bit, warẽmtağ jekuapteı dak je'ğũm wuywebe. Ipiat supı'ajoat wuywebe. Ixe Deus cũğ ma wuykuğ. Cedağ ma wuyekapıkapteı je'ğũm wuywebe. Weğũğũn ma wuykuğ.

4

¹ Kariwayayũ, cũğ ma juy eywebeam teı'ũma kapıkık'ukayũ epejukuk. Imuğuykukukum ğu ip epejukuk. Eyju dak kapıkpiğ eyekariwa beam—kabi beat peam. Ğebum cuy epesop iboap kay.

² Eybu'um ğu juy epesop Deus eju kawẽn ãm. Xexen ğu juy epesop kawẽnwẽn pıma ceweju—eyetabẽğbẽğ ma.

— Ęn xıpat cĩcã — i juy epe'e'e cebe.

³ Ocewebeam tak cuy epeyekawẽn Deus eju.

— Pauloyũ buywatwan cuy eğuy ixeyũ be ekawẽn muwẽn ãm soat ka watwat pe — i juy epe'e'e cebe. — Ixeyũ buywatwan cuy eğuy Cristo muwẽn ãm soat pe—kuy bıma o'ğuwẽn ğu iat ekawẽn muwẽn ãm — i juy epe'e'e cebe.

Daomũnmũnap'a be õn ğasũ iboap ekawẽn muwẽnuwẽn cuk adı ojekuku buye. ⁴ İbapuç ma juy iboap ekawẽn oğuwẽn. İmẽnpuye:

— Pauloyũ juy esubuywatwan ixeyũ be ibapuç ma kawẽn idıpat muwẽn ãm adeayũ be — i juy epe'e'e cebe.

⁵ Eysũsũn ğu juy epesop Jesus muwẽn ãm itabut'ũmayũ be imuwẽn put pıma. Eyağuyısan cuy epeku ixeyũ mu'ukpıceğẽğẽnap puxım Cristo kay. ⁶ Te'e ğu juy epeyekawẽn itabut'ũmayũ eju. Eyekawẽnkum cuy

epeyekawēn ceweju ip eyekawēn kay ip ibu'unap puxim. Eyetaybin cuy epesop cedaḡ ma ya'ōbu am ip.

⁷ Wuykitpit Tícico wawēḡ ḡuwēn eywebe—soat awēḡ ḡuwēn. Ixe Tícico ikukpin cīcā wuyxe. Ixe cūḡ ma kapikpiḡ warara'acayū beam—itabucayū beam. Wuyweju ixē dak kapikpiḡ wuykukukat peam. ⁸ Ixe oḡuju eykay eymucokcok am, oceju xipat iap muwēn ām eywebe. ⁹ Wuykitpit Onésimo oḡuju eykay Tícico eju. Ixe Onésimo cūḡ ma jekukum. Ikukpin cīcā wuyxe. Eyka bewiat ixē. Apēnpēn ijopka watwat iap ḡuwēn ip eywebe.

¹⁰ Aristarco kato mujujum eywebe. Oweju ixē dak omuy daomūnmūnmūnap'a be. Marcos tak kato mujujum eywebe—Barnabé kipitaap. Ixe Marcos eykay jajēm iap awēḡ kuy epeyawēḡtobuxik. Ixe ajēm puje xipan cuy epeḡuajēm eyduk'a be. ¹¹ Josué Justo kato mujujum eywebe. Ixeyū acā Judeuyū kapikpiḡ oweju—ebapūḡayū: Aristarco, Marcos, Josué Justo. Ibūrū ma. Kapikpiḡ ip oweju warara'acayū mutabut am Jesus kay, Deus pe jekuk am. Obuywatwan cīcā osodop ip omucokcokḡ.

¹² Epafras tak kato mujujum eywebe—eyka bewiat—Jesus Cristo beam kapikpik'ukat. Soat em ixē kawēnwēn Deus eju eywebeam.

— Colossos ka watwat a'ōmucanucan cuy eḡuy ixeyū be jetabucap epereap puxim — i'e'em ixē Deus pe eymuwēnuwēn. — Ixeyū a'ōmucanucan cuy eḡuy ixeyū be Jesus eju mūḡ'i jeku am — i'e'em ixē cebe. — Ixeyū a'ōmucanucan cuy eḡuy ixeyū be soat em ma ebikuyap taḡ jeku am — i'e'em ixē Deus pe eymuwēnuwēn.

¹³ Kapikap iba'ore jījāat kukap puxim ixē Epaфро kawēnwēn cīcā Deus eju eywebeam, Laodicéia ka watwat peam tak, Hieriapolis ka watwat peam tak. Ōn ma iboap muwēnuwēn eymukūyjojom. ¹⁴ Lucas kato mujujum

eywebe—ocexe ikukpin cĩcãat—wuyanũġtata'ukat. Demas tak kato mujujum eywebe.

¹⁵ Oceju kato mujujum warara'acayũ be Jesus kay itabucayũ be—Laodicéia ka watwat pe. Nínfa be dak kato mujujum oceju, ixé duk'a be je'aweroro'ukayũ be dak—itabucayũ be. ¹⁶ Eywebe ijudup co buje juy epetup-muju Laodicéia ka watwat pe ixeyũ be tup co am. Kuy juk wara'atup otupmuju ixeyũ beaptum. Ixedup ixeyũ tupmuju eywebe tupco buje. Ixedup tak epetupcoat.

¹⁷ — Wuykukukat ewebe o'ġũmiap ekapikap kuġ cuy ejeku — i juy epe'e Arquipo be. — Ekapikap cuy eġu'ũm — i juy epe'e cebe.

¹⁸ Ōn ma obubin ma Paulo kato mujujum eywebe iaptup mubarararaġ. Eyaġuyba'ũm ġu juy epesop kawēn ãm Deus eju owebeam, ōn daomũnmũnap'a be bima.

— Bay, xipan cuy Colossos ka watwat ejukuk — i ōn e'em Deus pé.

Wemudupmubararaktup pe bit kuy oi'ũm.

Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

